

Premi special da filmar per Gian-Andrea Huonder

Cun siu project da film «The AMZ Experience» ha Gian-Andrea Huonder da Mustér gudignau dacuort il premi special da produziun a caschun dalla concorrenza per films cuorts dalla Svizra Orientala. Ina satisfacziun pil giuven filmader che fa da sia pissiun la professiun.

SUSI ROTHMUND/FMR

Dapi sia affonza ei *Gian-Andrea Huonder* fascinaus dalla fotografia ed ils davos onns eis el oravontut seconcentraus sil filmar. La documentaziun da video «The AMZ Experience» ei stada in interessant project da hobi pil giuven da 21 onns. Il filmin ei dil reminent da veser sin Youtube. Duront pliras fins da jamna ha el accumpignau cun sia camera da video ina grupp da studentas e students dalla Scola politecnica federala (SPF) a Turitg sco era dalla Scol'aula a Lucerna. Gian-Andrea Huonder ha filmau co ei han sviluppu e testau in vehichel da cuorsa per la «Formula Student» internaziunala. Cun *Shichao Zhang* fa era in anteriur conscolar da Huonder part da quella grupp. El e Gian-Andrea Huonder han fatg il 2019 la matura el seminari dalla claustra a Mustér.

Motivaziun da cuntinuar

Damai ch'il project da filmar la grupp da students alla lavur ei staus ina lavur da hobi ei Gian-Andrea Huonder buca vegnius remuneraus persuerter. Tenor il giuven filmader eis ei denton stau ina interessanta experientscha ed el ha empriu d'enconuscher massa glieud. L'organisaziun e far las intervestas culs differents protagonists numna Gian-Andrea Huonder la sfida la pli gronda per la realisaziun da quei filmin da sis minutas e mesa. Tier la concorrenza per films cuorts dalla Svizra Orientala ha ei dau treis categorias. Ina per clips da musica, in'otra per filmaders professiunals ed ina tiarza per giuven filmaders. Tut en tut ein 80 personas separticipadas alla concorrenza e dudisch ein vegnidas premiadas. Il premi special da produziun dalla concorrenza per films cuorts dalla Svizra Orientala eri dotaus cun 500 francs. Per Gian-Andrea Huonder – ch'ei separticipaus ella categoria dils filmaders giuven e per l'emprema ga insumma ad ina concorrenza da filmar – ha il premi surtut ina gronda valor ideala: «Igl ei ina biala reconuschienscha per tut mia lavur ed ina motivaziun da cuntinuar. Quei dat anim da separticipar a concorrenzas da filmar era igl avegnir.»

Studi da film

Suenter la matura ha Gian-Andrea Huonder prestau in onn survetsch militar. Allora ha el fatg in praticum da siat meins sco producent da multimedia tier l'interpresa da chemia EMS a Domat. Actualmein lavura el tier la Hamilton a Bonaduz sco assistent da multimedia. Per gronda part el homeoffice realisescha el filmins e fotografias per l'interpresa enconuschenta. Silla fin uost ha il giuven filmader denton abdicau sia piazza damai ch'el ha il grond giavisch d'entscheiver quest atun il studi da film alla Scol'aula d'art a Turitg. Damai che sulet 16 da

rodund 180 persunas annunziadas vegnan recepidas pil studi, eis ei buca sempel da realisar quei giavisch. Gian-Andrea Huonder ei denton in tip optimistic e ha perquei era buc fatg in plan B. Actualmein eis el vid realisar in film cuort. Quel ei ina part dall'annunzia alla Scol'aulta turitgesa dils arts. La tematica dada ei «Kein Zurück». L'idea pil film (dramatic) da Huonder para aschi veglia sco actuala ed originala. Alla publicitad vul el denton aunc buca tradir quella.

DHD-Media

Gia duront ch'els eran el gimnasi dalla claustra a Mustér han Gian-Andrea Huonder, *Martin Defuns* e *Nils Deragisch* fundau in 'atgna fatschenta, la *DHD-Media*. Suentar treis onns ha *Nils Deragisch* bandunau il team. *Ils giuvens talentai han astgau realisar differents films da publicitad e documentaziun per organisaziuns turisticas, per la claustra e per occurrenzas. Sin lur pagina d'internet ein entgins filmins da marketing d'anflar. Per exempel in davart la cultura e natira a Trun e Sumvitg, la EX18 ni era la renovaziun interna dalla claustra. Pil mument realiseschan Huonder e Defuns negins projects communabels cun DHD-Media. «Nus fotografein e filmein mintgin per sesez. Igl avegnir sa ei tuttavia esser che nus reactivein puspei nossa lavur communabla», declara Gian-Andrea Huonder.*